

Evening Dogri (NSD) News

20 Nov. 2025

खबरां

- भारत दा 56मां अंतराष्ट्रीय फिल्मोत्सव अज्ज गोआ च शुरु होआ- सूचना ते प्रसारण राज्यमंत्री डाक्टर एल. मुरुगन होरें पणजी च वैवज्ज फिल्म बाजार दा बी उदघाटन कीता।
- लाल किला कार धमाके आहले मामले च एन.आई.ए नै अज्ज 4 होर आरोपियें गी गिरफ्तार करी लैता।
- प्रधानमंत्री नरेन्द्र मोदी होरे जी-20 लीडरें दे 20में शिखर सम्मेलन च हिस्सा लैने लेई कल दक्खन अफ्रीका जा करदे ना।
- जनता दल यूनाइटेड दे अध्यक्ष नितिश कुमार होरें अज्ज रिकार्ड 10मीं बारी बिहार दे मुखमंत्री दे रुपै च सगंध चुक्की- 26 मंत्रियें गी बी नमें मंत्रीमंडल लेई शपथ दोआई गई।
- 2024-25 दौरान भारत दा रक्षा उत्पादन रिकार्ड इक लक्ख 54 हजार करोड़ रपे कोला बी उप्पर पुज्जी गया ऐ।
- ई.डी नै पैहे दे गैर-कनूनी लैन-देन आहले इक मामले च रॉबर्ड वाडरा खलाफ आरोप-पत्र दाखल कीता ऐ।
- विश्व मुक्केबाजी कप दे फाइनल मकाबलें च भारतीय महिलायें दा शानदार प्रदर्शन-भारत लेई जित्ते सुन्ने दे तगमे।

<><><><><><>

Goa Film Festival

भारत दा अंतराष्ट्रीय फिल्म महोत्सव IFFI-2025 अज्ज गोआ दी राजधानी पनजी च शुरु होआ। महोत्सव दी शुरुआत इक शानदार ते रंगारंग उदघाटन परेड ते समारोह कन्नै शुरु होई। 10 दिने तोड़ी चलने आले इस फिल्म उत्सव च 81 मुखें दियां कोई ढाई सौ फिल्मां दस्सियां जागंन। इस फिल्म उत्सव च जापान- Country of Focus यानि चेचे ध्यान आहला मुख रखेया गेदा ऐ। फिल्मोत्सव दी शुरुआत ब्राजील दी फिल्म द ब्लू ट्रेल कन्नै होई। सूचना ते प्रसारण राज्यमंत्री एल. मुरुगन होरें अज्ज 56में भारतीय अंतराष्ट्रीय फिल्म उत्सव च वैवज्ज फिल्म बाजार दा बी उदघाटन कीता। इस मौके उनें आखेया जे ए बाजार रचनाकारें ते लोकें बशकार इक पुलै दा कम्म करौग। वैवज्ज फिल्म बाजार 24 नवम्बर तोड़ी चलोग।



SC- Prez

सुप्रीम कोर्ट नै आखेया ऐ जे संविधान दी धारा 200 ते 201 दे तैहत राष्ट्रपति ते राज्यपाल आसेया विधेयके गी मंजूरी देने दे सरबंध्य अदालत कोई समे-सीमा तैहत नैई करी सकदी। मुख् न्यायधीश बी.आर. गवई हुंदी अध्यक्षता आहली 5 जजे दी संवैधानिक पीठ नै आम सैहमती कन्नै आखेया जे राज्यपाल विधानसभा आसेया पास विधेयके गी संविधान दी दफा 200 दे तैहत तैयशुदा प्रक्रिया दा पालन कीते बिजन- जेकर रोकी रखदे न तां एह संघीय ढांचे दे हितै च नैई होग। एह फैसला राष्ट्रपति हुंदे उस संदर्भ पर आया- जेहदे च राज्यपाल ते राष्ट्रपति दी मंजूरी लेई समे-सीमा तय करने गी लेइयै सफाई मंगी गेदी ही। एहदे शा पैहले तमिनाडू विधेयक मामले च सुप्रीम कोर्ट दी दंऊ जजे दी पीठै राज्यपाल आर.एन रवि हुंदे आसेया लम्मे समे तगर कोई कारवाई नैई करने गी गैर-कनूनी- अवैध ते मनमानी दस्सेया हा। सुप्रीम कोर्ट नै विधानसभा थमां दुई बारी पास होए दे विधेयके गी राष्ट्रपति ते राज्यपाल दी मंजूरी लेई त्रै महीने दी समे-सीमा तैह कीती ही।



Prz -Tribal

राष्ट्रपति द्रौपदी मूरमू होरें आखेया ऐ जे देश दा विकास ते आदिवासी समुदाये दा विकास दवै इक-दुए दे पूरक न। छत्तीसगढ दे अंबिकापुर च अज्ज जनजातीय गौरव दिवस दे सिलसिले च लोआए गेदे इक समारोह गी सम्बोधत करदे होई राष्ट्रपति होरें आखेया जे आदिवासी समुदाये दा योगदान भारत दे इतिहास च इक गौरवशाली धेया ऐ। उने आखेया जे आदिवासी संस्कृति स्हाडी विरासत ते पंछान ऐ ते इस्सी सजोइयै साम्बियै रखता स्हाडा सभने दा फर्ज ते जिम्मेदारी ऐ। समारोह दौरान राष्ट्रपति होरें आदिवासी समुदाय दे नेताएं दे कन्नो-कन्नी आदिवासी क्रांतिकारिये ते स्वतंत्रता सेनानिये दे परिवार आहलें गी बी सम्मानित कीता। एहदे इलावा जनजातीय गौरव दिवस समारोह दे हिस्से दे रुपै च आयोजित लोक नृत्य परियोगिताएं दे विजेताएं गी बी सम्मानित कीता। कार्यक्रम च छत्तीसगढ दे राज्यपाल रमेन डेका- मुख्मंत्री विष्णु देव साय- केन्द्री राज्यमंत्री दुर्गादास उडके ते केई होर जनप्रतिनिधि बी मजूद हे।



NIA -Arrest

राष्ट्रीय जांच एजेंसी एन.आई.ए नै अज्ज दिल्ली दे लाल किले कश होए दे कार धमाके आली आतंकी घटना च शामिल 4 होर मुख आरोपियें गी गिरफ्तार कीता ऐ। एजेंसी नै इक ब्यान च दस्सेया जे पटियाला हाउस अदालत दे जिला सत्र न्यायधीश दे हुकम पर 4एं आरोपियें गी एजेंसी नै जम्मू-कश्मीर दे श्रीनगर च हिरासतै च लैता ऐ। एजेंसी आसेया गिरफ्तार कीते गेदे आरोपियें च जम्मू-कश्मीर दे डाक्टर मुजमिल शकील गनेई- डाक्टर आदिल अहमद राथर ते मुफ्ती इरफान अहमद वागे ते उत्तर-प्रदेश दा डाक्टर शाहीन सईद शामिल ना। एजेंसी नै दस्सेया जे इनें गिरफ्तारियें दे कन्नै गै इस मामले च गिरफ्तार कीते गेदे आरोपियें दी गिनतरी 6 होई गई ऐ। एजेंसी दा आखना ऐ जे मामले च पूरी आतंकी साजिश दा परदाफाश करने दे जारी जतनें दे तैहत पैहले गिरफ्तार कीते गेदे आरोपियें दी पुच्छ-गिच्छ जारी ऐ।



PM-SA Visit

प्रधानमंत्री नरेंद्र मोदी होर जी-20 लीडरें दे 20में शिखर सम्मेलन च हिस्सा लैने लेई 21 थमां 23 नवंबर तगर जोहानास्बर्ग दक्खन अफ्रीका दा दौरा करडन। एह वैश्विक दक्खन च आयोजित होने आह्ला उप्परोतली चौथा जी-20 शिखर सम्मेलन होगा। विदेश मंत्रालय नै इक बयान च आखेआ जे शिखर सम्मेलन च प्रधानमंत्री जी-20 एजेंडे पर भारत दा दृष्टिकोण पेश करडन। प्रधानमंत्री हुंदे आसेआ शिखर सम्मेलन दे त्रौणें सत्रें गी सम्बोधित करने दी मेद ऐ। जी-20 लीडरें दे शिखर सम्मेलन थमां बाहरें श्री मोदी जोहानास्बर्ग च मौजूद केई लीडरें कन्नै दपक्खियां बैठकां बी करडन। ओह दक्खन अफ्रीका आसेआ आयोजित भारत-ब्राजील-दक्खन अफ्रीका नेताएं दी बैठक च बी हिस्सा लैडन।



Nitish -CM

जनता दल यूनाईटेड प्रमुख नीतिश कुमार होरें अज्ज बडुलै 10मीं बारी फही बिहार दे मुखमंत्री दे तौरा पर संगंध लैती। बिहार दे राज्यपाल आरिफ मोहम्मद खान होरें उनेंगी ओहदे ते गोपनीयता दी संगंध दोआई। संगंध लैने आहले समारोह दा आयोजन पटना दे ऐतिहासिक गांधी मैदान च कीता गेदा हा। इस मौके पर प्रधानमंत्री नरेन्द्र मोदी- केन्द्री मंत्री अमित शाह- जे.पी नड्डा- चिराग पासवान ते राष्ट्रीय जनतांत्रिक गठबंधन एन.डी.ए दे मते सारे लीडर उत्थे मौजूदू हे। मुखमंत्री नीतिश कुमार सनें होरनें 27 मंत्रियें नमीं बिहार सरकार च मंत्री ओहदे दी संगंध लैती। इस समारोह च सम्राट चौधरी- विजय कुमार सिन्हा- दिलीप जयसवाल-मंगल पांडे- नितिन नबीन ते राम कृपाल यादव सनें बी.जे.पी. दे लीडर

नीतिश कुमार दे मंत्रीमंडल च मंत्री पद दी संगध लैती। जिस्सलै के जनता दल युनाईटेड दे लेशी सिंह- श्रवण कुमार- बिजेन्द्र प्रसाद यादव- ज़मा खान ते अशोक चौधरी नै बी मंत्री पद दी संगध लैती। एन.डी.ए च बी.जे.पी. नै 89 विधानसभा सीटें पर JD (U) नै 85 सीटें पर- लोक जनशक्ति पार्टी रामविलास नै 19 सीटें पर- हिंदुस्तानी आवाम मोर्चा नै 5 सीटें पर ते राष्ट्रीय लोक मोर्चा नै 4 विधान सभा सीटें पर जित हासल कीती। वरोधी महागठबंधन गी छड्डियां 35 सीटां गै थ्होइयां।

<><><><><><>

VC- President Congratues

उपराष्ट्रपति सी.पी. राधाकृष्णन होरें नीतिश कुमार ते उंदे नमें नियुक्त मंत्रियें गी मबारकबाद दिती ऐ। सोशल मीडिया पोस्ट च उपराष्ट्रपति होरें भरोसा दोआया ऐ जे उंदी सांझी अगुआई राज्य आस्तै सतत विकास- सुशासन- समावेशी विकास ते समृद्धि आस्तै इक नमें युग दी शुरुआत करोग। उनें बिहार दे लोकें दी ताहंगे गी पूरा करने च उंदी सफलता दी कामना बी कीती।

<><><><><><>

PM –Congrates Nitish

प्रधानमंत्री नरेन्द्र मोदी होरें बी बिहार दे मुख्मंत्री ओहदे दी संगध लैने आस्तै नीतिश कुमार गी बधाई दिती। सोशल मीडिया दी इक पोस्ट च प्रधानमंत्री होरें आखेया ऐ जे नीतिश कुमार इक अनुभवी प्रशासक ना। श्री मोदी होरें उनेंगी नमें कार्यकाल आस्तै शुभकामनां दितियां। उनें सम्राट चौधरी ते विजय कुमार सिन्हा गी उपमुख्मंत्री दा कार्यभार साम्भने पर बी उनेंगी बधाई दिती ते जमीनी सतह पर कम्म करने ते लोकें दी सेवा आस्तै वचनबद्धता पर लौ पाई। श्री मोदी होरें बिहार सरकार च शामिल होए दे सब्भनें मंत्रियें गी बी मबारकबाद दिती ऐ।

<><><><><><>

Defence Production

भारत नै 2024-25 दौरान इक लक्ख 54 हजार करोड़ रपे दा रक्षा निर्माण कीता ऐ- जेड़ा अजे तोड़ी दा सब्भनें शा मता ऐ। इस अवधि दौरान रक्षा निर्यात बी रिकार्ड 23 हजार 622 करोड़ रपे तगर पुज्जी गया जिस्सलै के 2014 च ए इक हजार करोड़ रपे कोला बी घट्ट हा। रक्षा उत्पादन च ए बाद्दा पिच्छले इक दहाके च देसा दे सैन्य औद्योगिक आधार गी बढ़ावा ते समर्थन देने ते नतीजे पर दर्ज कीता गया ऐ। रक्षा मंत्रालय नै आखेया ऐ जे रक्षा बजट जेड़ा

2013-14 च 2 लक्ख 53 हजार करोड़ रपे हा ओ 2025-26 च 6 लक्ख 81 हजार करोड़ रपे होई गया ऐ- जेडा देश दे फौजी बुनियादी ढांचे गी मजबूत करने दी सरकार दी प्रतिबद्धता गी दर्शादा ऐ। मंत्रालय दा आखना ऐ जे सरकार दा लक्ष्य 2029 तगर 3 लक्ख करोड़ रपे दा रक्षा निर्माण ते 50 हजार करोड़ रपे दा रक्षा निर्यात हासल करना ऐ। एदे कन्नै आर्थिक विकास गी बढ़ावा दिंदे होई भारत वैश्विक रक्षा विनिर्माण दा इक प्रमुख केन्द्र बनी जाग।



E.D Wadra

माली नियम कायदे लागू करने सरबंधी निदेशालय ई.डी नै बरतानिया दे थेआर बचोलिएं संजय भंडारी कन्नै जुडे दे पैहले दे गैर-कनूनी लैन-देन दे मामले च राबर्ट वाडरा हुंदे खिलाफ आरोप-पत्र दाखल कीता ऐ। उन्नै रपे पैहे दे लैन-देन सरबंधी अधिनियम दी विशेष अदालतै च एह आरोप-पक्ष दाखल कीता ऐ। वाड्रा हुंदे खिलाफ पैहे दे गैर-कनूनी लैन-देन दा एह दूआ आरोप-पत्र ऐ। इस बरे जुलाई च हरियाणा दे शिकोह पुर च जिमी सौदे दे इक मामले च कथित बेज़ाब्तियें-गड़बड़ियें दे सरबंधै च बी ई.डी नै वाडरा दे खिलाफ आरोप-पत्र दाखल कीता गया हा। संजय भंडारी कन्नै जुडे दे इक मामले च ई.डी पैहले बी वाडरा कोला पुच्छ-गिच्छ करी चुके दा ऐ। भंडारी गी इस्सै बरे जुलाई च दिल्ली दी इक अदालतै फरार आर्थिक अपराधी धोषत कीता हा ते बरतानिया दी इक अदालतै उसी भारत आहन्ने दी अर्जी गी खारज करी दिता हा।



Boxing

उत्तर-प्रदेश दे ग्रेटर नोयडा च चला रदे विश्व बाक्सिंग कप दे फाईनल च भारतीय महिला मुक्केबाजें शानदार प्रदर्शन करदे होई इतिहास रची दिता ऐ। भारतीय मुक्केबाज अरुण दत्ती चौधरी- प्रीति पवार- मिनाशी हुड्डा ते नुपुर शेरॉन नै सुन्ने दे तगमे जित्ते ना। 70 किलोग्राम वर्ग च अरुण दत्ती चौधरी नै उज्जबेकिस्तान दी मुक्केबाज अज़िजा जोकिरोवि गी 5-0 सिफर कन्नै हराया जिस्सलै प्रीति पवार नै 54 किलोग्राम वर्ग च इटली दी सीरिन चैराबी गी बी 5 सिफर दी मात दित्ती। इस्सै चाली मिनाशी हुड्डा नै बी 48 किलोग्राम भार वर्ग च उज्जबेकिस्तान दी गै फोजिलोबा फरज़ोना गी बिजन कोई गलती कीते दे 5 सिफर कन्नै हराया- जिस्सलै जे नुपुर शेरॉन नै 80 किलोग्राम भार वर्ग च उज्जबेकिस्तान दी ओलटीनाय सोतिम बोएवा गी हराइयै सुन्नै दा तगमा जित्ती लैता।



Viza-UAE

भारत नै संयुक्त अरब अमीरात दे नागरिकें लेई वीजा ऑनलाइन आहली सुविधा च विस्तार करदे होई कोचीन, कालीकट ते अहमदाबाद अंतरराष्ट्री व्हाई अड्डें गी बी एहदे च शामिल करी लैता ऐ। नमी दिल्ली, मुम्बई, कोलकाता, चेन्नई, बेंगलुरु, हैदराबाद ते कोच्ची व्हाई अड्डें पर एह सुविधा पैहले सवां गै उपलब्ध ऐ। यू.ए.ई दे नागरिकें गी हून भारत दे 9 प्रमुख व्हाई अड्डें पर एह सुविधा उपलब्ध होग। इस सुविधा दा फैयदा छडे उइयै नागरिक ठोआई सकडन जिनें पैहले बी कदें भारती ई-वीजा जा कागजी वीजा हासल कीते दा होग। इस योजना दे तैहत भारत औने आहले यू.ए.ई दे नागरिक 60 दिनें तगर भारत च रेही सकदे न ते सैलसफा, कारोबार, सम्मेलनें ते इलाज मोआलजे दे मकसद कन्नै इत्थे आई सकदे न। एह वीजा 60एं दिनें च दऊं बारी औने दी खुल्ल दिंदा ऐ। उआं एह सुविधा यू.ए.ई दे उनें नागरिकें लेई नेई ऐ जिंदे माता-पिता या दादा-दादी पाकिस्तान च पैदा होए दे होन जा उत्थै दे स्थाई बाशिंदे होन।



Jaishankar Afgan

विदेशमंत्री डाक्टर एस. जयशंकर होरें अज्ज नमीं दिल्ली च अफगानिस्तान दे उद्योग ते बपार मंत्री अलहाज नूरुद्दीन अज़ीज़ी हुंदे नै मलाटी कीती। इक सोशल मीडिया पोस्ट च डाक्टर जयशंकर होरें आखेया जे उनें बपार- राबिता ते लोके-लोके बश्कार आपसी सरबंधें गी मजबूत बनाने ते उपाएं पर चर्चा कीती। विदेश मंत्री होरें अफगानिस्तान दे लोके दे विकास ते भलाई-बेहतरी लेई भारत दा समर्थन दोहराया।



Balochistan

बलूच नेता मेहराम मरीं बलोचिस्तान च बड्डे पैमाने पर लोके गी जबरन गैब करने- हत्याएं करने ते मनमाने तरीके नै हिरासतै च लैने दा आरोप लांदे होई- पाकिस्तान दे मानवाधिकारें दे रिकार्ड पर जोरदार हमला कीता गया ऐ। इक समाचार एजेंसी कन्नै गल्लबात दौरान मेहरान मरीं होरें आखेया जे इस प्रांतै दे हालात इन्नै डरने ते तकलीफदायक होई चुके देन जे हर आम आदमी अंदर बेबसाही- बेयकीनी चिंता-डर-त्राह ते बेवसी आहली स्थिति बनी पेदी ऐ कीजे उत्थै बलोचियें पर जुल्म ज्यादातियां इक सोची समझी नीति दे तैहत कीतियां जा रदियां न। उनें आखेया जे पाकिस्तानी फौज नै न छड्डा बलोचिस्तान च हमले च बाद्दा कीता ऐ सगुआं पाकिस्तान दियें सीमाएं शा बाहर बलूच रिफ्यूजियें गी बी नशाना बनाया जा रदा ऐ।